

A togail fo eagal an ceann ;  
 Ri d' fhaicinn cho àillidh 'nad shuain,  
 Theich iadsan gun tuar o d' thaobh.  
 Gabhsa codal ann do chòs,  
 A ghrian ! is till o d' chlos le h-aoibhneas.

## SGEUL COMAIL.

Bha Comal o Alba féin ;  
 Thar ceud beinn bu thriath an triath,  
 O mhìle sruth dh'òladh 'fhéidh ;  
 Chluinnt' a choin air mìle sliabh ;  
 Bha 'aghaidh cho sèimh ri òighe,  
 Bu bhàs a làmh mhòr do laoich.  
 Bha 'rùn do ainnir, 's bu chòrr i.  
 Nighinn Chomhluich nan còrn 's nam faobh.  
 B' is' an gath-gréine 'measg bhan ;  
 Bu duibhe na fitheach a ciabh ;  
 Bu luath a caoin sheilg air tràigh ;  
 Chluinnt' a bogh' air ghaoith nan sliabh.  
 Bha h-anam air Comal a' tàmh ;  
 'S tric thachair 'an gràdh an suil,  
 'S a' mhonadh bha iomairt an làmh,  
 Bu taitneach an sanas air chùl.  
 Bu rùn do Ghruamal an òigh ;  
 Triath Ardbheinn nam mòr neòil.  
 Bha 'aire mu h-astar o shlòigh,  
 Nàmhaid Chomail nan gorm-sgiath.  
 Aon là o 'n t seilg, is iad sgàth,  
 Ceò a cleith na frith o 'n t-sluagh,  
 Thachair Comal is ainnir gun chliath  
 'N còs Ronain aig srìth nan stuadh,  
 Aite-còmhnuidh do Chomal o 'n t-seilg,  
 Dha féin is do àirm nam buadh.  
 Bha ceud sgiath àrd gun mheirg,  
 Ceud clogad treun de chruaidh.